

## CI ENCOUMENCE LA CHANSON DE PUILLE

I

Qu'a l'arme vuet doner santei

Oie de Puille l'errement !

Diex a son regne abandonei :

4 Li sien le nos vont presentant

Qui de la Terre ont sarmonai.

Quanque nos avons meserreï

Nos iert a la croix pardonei :

8 Ne refusons pas teil present.

II

Jone gent, qu'avez enpencei ?

De quoi vos iroiz vos vantant

Quant vos sereiz en viel aei ?

12 Qu'ireiz vos a Dieu reprovant

De ce que il vos a donei

Cuer et force et vie et santei ?

Vos li avez le cuer osteï :

16 C'est ce qu'il vuet, tant seulement.

III

Au siecle ne sons que presteï

Por veoir nostre efforcement.

Nos n'avons yver ne esteï

20 Dont aions asseürement ;

Si avons jai grant piece esteï,

Et qu'i avons [nos] conquesteï

Dont l'arme ait nule seürteï ?

24 Je n'i voi fors desperement.

IV

Or ne soions desesperei,

Crions merci hardiement,

Car Dieux est plains de chariteï

28 Et piteuz juqu'au Jugement.

Mais lors avra il tost conteï

Un conte plain de grant durteï :

« Veneiz, li boen, a ma citeï !

32 Aleiz, li mal, a dampnement<sup>1</sup> ! » *f. 59 v<sup>o</sup> 2*

V

Lors seront li fauz cuer dampnei

---

<sup>1</sup> Cf. Matth. 25, 34 et 41. L'idée des v. 27-32 se retrouve dans la *Nouvelle Complainte d'Outremer* 31-34.

Qui en cest siecle font semblant  
Qu'il soient plain d'umilitei  
36 Et si boen qu'il n'i faut noiant,  
Et il sont plain d'iniquitei ;  
Mais le siecle ont si enchantei  
C'om n'oze dire veritei  
40 Ce c'on i voit apertement.  
VI

Clerc et prelat qui aünei  
Ont l'avoir et l'or et l'argent  
L'ont il de lor loiaul chatei ?  
44 Lor peres en ot il avant ?  
Et lors que il sont trespassei,  
L'avoir que il ont amassei  
Et li ombres d'un viez fosseï<sup>2</sup>,  
48 Ces deus chozes ont un semblant.  
VII

Vasseur qui estes a l'osteï,  
Et vos, li bacheleir errant,  
N'aiez pas tant le siecle ameï,  
52 Ne soiez pas si nonsachant  
Que vos perdeiz la grant clarteï  
Des cielz, qui est sans oscurteï.  
Or varra hon vostre bonteï :  
56 Preneiz la croix, Diex vos atant !  
VIII

Cuens de Blois, bien aveiz erreï  
Par desai au tornoïement.  
Dieux vos a le pooir presteï,  
60 Ne saveiz combien longuement.  
Montreïz li se l'en saveiz greï,  
Car trop est plainz de niceteï  
Qui pour un pou de vaniteï  
64 Lairat la joie qui ne ment<sup>3</sup>.

Explicit.

*Manuscrit* : C, f. 59 v<sup>o</sup>.

---

<sup>2</sup> Cf. Pol Jonas, « *Li ombres d'un viez fosseï* : Rutebeuf, *La chanson de Pouille* (v. 47) », dans *Romania* 92, 1971, p. 74-87.

<sup>3</sup> F.-B. (II, 431) fait observer que Jean de Châtillon, comte de Blois, avait reçu d'Urbain IV, le 6 juillet 1264, la disposition pendant trois ans de certains revenus à condition qu'il prît la croix. On verrait ainsi dans l'apostrophe de Rutebeuf un effort pour l'entraîner dans la croisade de Sicile.

18. vostre - 22. nos *mq.*